

衢州文獻集成

「集部」

第
169
冊

衢州文獻集成

黃靈庚 諸葛慧艷

主編

〔集部〕

169

冊

第一六九冊目錄

北山小集四十卷（卷十七至三十八）

（宋）程俱撰
傳增湘影宋寫本

.....

北山小集卷第十七

信安程 俱

雜著

勝樂堂銘

華嚴經云世間所有種種樂勝寂滅樂爲最勝住
於廣大法性中因以銘云

我觀世人以苦爲樂椒蘭腐羶瓔帶纏索亦有樂者
妄幻相由如隔日瘡如停訊囚如執熱濯如負重休
是生滅相方樂方憂有負則釋無病何瘳熟如至人
性海無邊彈指三界而常湛然今則非住昔則非遷



是寂滅樂是出世間

靜虛堂銘

義興丞舍有堂曰靜虛信安江襄仲嘉始名之其里人程俱致道從而銘之一切不受致虛極也寂然不動守靜篤也惟致與守道之梏也萬境紛陳破即通而動即復也泊乎休哉莫覺屬也我言之珍妄見者之毒也

罔研銘

混天浮空玄以清中包厚黃東南傾芸芸擾擾皆強名因有名字字乃聲由是中出初無形予能了了無

沒生

又研銘余以遺江仲嘉

管城出遊得玄圃晞松風沐煙渚蒼華如雲秀筠楮
濕生蛇蚓化龍虎九經之淵百氏府伯畸銘歸仲
嘉甫

為趙叔問研銘

維渥不枯道之腴也維質不渝維涅不汙德之符也
蓋穎者日敝磨者日磷而迹者日徂我獨隤然居其
所而閱動化於無窮乎

鏡銘

物有隱見照無去來無作之應泊乎莫哉

一作真哉

幻住庵銘

為富樞
李申作

一切有情依真而住與諸如來同一國土不起真際
為大幻師如是住者無覺無離

普光明閣銘

禪鑒長老潛公為小閣於於潛治平之故棲閣東向
迎日之出故名之曰普光明以寶積經所說妙義次
而銘之

譬如日輪出山峯時光明普遍照闔浮提種種形類
青黃赤白皆悉顯現了無差別而彼日輪一光一色

菩薩亦爾以智慧日照於法界無有欣歎出彼衆生
執着山峯所緣一相一相亦空隨其意樂說正法藏
然於法界無有二相

榮節婦傳贊

自天下兵動變故或起於倉猝士之潔其身而保其
操者千一而况臨死生而志不奪而一女子乃能殺
身以全節蓋其貞則玉而剛石鐵也故可碎可折而
不可卷不可涅也是女子者其可謂烈也已矣

祭鄒侍郎文

嗚呼天之所靳唯德與名取之既多則畱其身有如

鄒公外粹中淳孟子之氣顏氏之仁其剛也無子子
自賢之色而其和也則有合乎挫銳而同塵故純誠
見於面目孝友行於閨門行義信於鄉黨操識推於
搢紳惟德之富莫之與倫巖穴之下荒徼之濱與夫
悍卒武夫孺子庸人莫不知公之名惟德與名公取
實多寔困顛濟非天則那萬里生還鄉閭舞歌公曰
上恩其言靡它公歸一年某仕蘭陵始以姻故膺門
是登徒見公安度醉整渙如春溫聽其言也則莫非
尊君愛物孝友忠厚之經至於脫粟之飯每甘於列
鼎雞栖之駕無異於華軒此固公之優為者已而能

使闔門千指莫不意滿欣若養三牲而食萬錢則知公之道非不行于世而世之所願莫得兼其全斥久窮極可以忘言所可必者既獨善而居約則庶幾於永年名則不朽德則不愆身則不偶而命復不延又莫知其所以然者豈其難諶不測所以為天乎遠日云卜靈輒既陳絮酒隻雞百里來奔升公之堂如有話言寂聽無聞淚如河翻我豈不知公固超然其已出六合而無礙與星漢而長存矣何去來之足論然安有折長松於盛夏埋玉人於九原而見之者無失聲而涕漣者乎臨其穴惴惴其慄言有既而情不能

宣也英爽實在尚其鑒旃

祭江仲嘉褒文

嗚呼事莫之致則歸之天天善窮仁天豈其然如仲
嘉甫有美其質完其所受養之以直平生色詞莫為
利屈脩然往來皎皎獨立其達似豪其真似嬾其淳
似疏其靜似簡不蘄乎高蓋與俗反矯如長松節目
磊落迹其細行畢中繩獲孝于其親友于兄弟信於
友朋恕及僮隸刑于室家莫不蹈義兼而有之蓋亦
鮮儷我行四方陰察士友或持于初而喪于久或違
其心而誦於口如端木賜一出一入如原巨先遂行

淫泆維仲嘉甫以表知實躬行不言終始若一求之
古人百不六七吾嘗誦言是子可必云胡不淑萬事
永畢嗚呼哀哉言念丙子識君京師語未一再君以
憂歸歲在辛巳我室君媚論心定交今十六歲蓋無
一年不與子會君解餘杭面我于蘇我將西游君寓
南徐我省松楸君在鄉問訪君宜興過我市區周旋
吳興俯仰歲徂大滌之天焦先之廬荆谿之流離墨
之岨巖洞相望仙靈所都衡山之竒巖谷之墟卜峯
朝雲茗水秋蕖無舟不同有駕齊驅我唱子和我文
子書別無幾時倅然相遇歡言酌酒引滿道故高談

雄辯出入精脩神遊八紘眇視千古遺形忘世奚復
外慕方其問時書尺相繼或真或篆或草或隸有言
必酬無遠不寄舒其蘊懷雜以詼戲發吾狂言動子
長喟開緘獨笑千里面對遠無虛月近則旬至牛腰
積多雞肋莫弃今而觀之忽若夢寐嗚呼臯斤是事
已矣去年之秋過我而西子神雖昌而色甚蹙送子
西郊匆匆語離劇飲大笑無復向時曰老則然余竊
異之誰謂此別無相見期嗚呼哀哉君於養生實惟
其人要若灰木用之不勤居屏世味食無葷羶出從
百為志在三田宴寂未久其息兀然不起于坐可證

初禪我常謂君骨強志堅是巖壑人必永其年而病
且死如何可言嗚呼哀哉儒老釋道所修者真視此
形骸何異塊塵脫然去之如逆旅賓如遺敝屣如釋
負薪脩短共盡亦何足云孰如仲嘉持身養神無罪
無悔不着不淪當與汗漫游於無垠出入騰化如臂
屈伸是必然者非此其身我視此世相知幾人如我
與子氣合情親十六年間義如弟昆稽之笠乾豈其
宿因君之嘉配維古賢婦葬之烏程我誌其墓誰謂
今者歲適一周復緝吾文銘君之幽淚洒行間泣然
莫收君喪還吳我客轂下送君襄陵莫致奠葦及茲

東歸取道吳興雞黍之設恍如平生庶幾神交來享
余誠

王八侍郎祭文

維宣和六年歲次甲辰七月丙子朔十一日丙戌從
表姪程某謹以茶菓素饌清酌之奠致祭于表叔寶
文學士太原郡侯之靈嗚呼天有間氣是生公侯剛
柔愿栗賦委異侔公之所鍾和厚純靜大雅恢閎德
人之盛雖則和厚不可疏親靜而不固既純且明風
度凝遠絕世垢塵論議英發出言成文視此標鑒神
仙中人惟初未冠發策帝庭拔出人上譽走四方為

郡文學博士先生齎鹽八年泊若無營棲遲三館出
佐一州入未幾時遂侍前旒譬彼瓌異為世所求不
疾而馳顧豈我謀藹藹其華秩秩其音聖主所器宰
府所欽名位之來走避不能公在天朝寶璐明珠照
十二乘和鸞九衢亦猶靈囿孔翠鸞鵠羽儀絢粲光
動草木公治省曹通達政體公誥命溫厚純美興
言所期必相天子何以占之惟德與器庶幾前人休
養康濟入則諷議將美贊猷出把將符坐嘯輕裘聊
以華國亦以鎮浮竊嘗有言物有定價人有品儔金
玉之利不如戈矛騶麟之用不如馬牛較第等差孰

處其尤世有如公實第一流某也不肖頑頓朱愚始
以童子拜公南徐及官太湖公鎮龍舒顧睽歎惜刻
畫吹噓借重培塿比之衡廬肝肺開示底蘊無餘華
首游倦願言卜居庶幾親仁環堵是圖公聞此言載
色載愉辱置懷抱期通有無孤窮不孝尋遭禍罰葬
親五州居計益決承顏接詞一日三月如何不慙不
至耄耄嗚呼哀哉吾鄉多士繼出更奮公一輩人凋
喪遂盡公沙五龍松折山殞風流醞藉無復耆雋昔
者曾子身被齊衰子張氏沒往哭之哀賢哲是痛吊
也歟哉惟俱不天怙恃永已得見父執如痿暫起於